

四庫全書

集部

欽定四庫全書

集部
朱軒文集卷八

詳校官中書臣賈 鏊

中書臣劉源溥覆勘

總校官庶吉士臣倉聖脉

校對官中書臣吳甸華

勝錄舉人臣張曾秀

欽定四庫全書

未軒文集卷七

明

黃仲昭 撰

五言詩

懷古

吾聞庖羲氏爰始開鴻荒
庖羲既已往迺復生神農
厥後有軒轅繼統為三皇
鼎湖龍去後堯德益輝煌
有虞受其禪恭已垂衣裳
禹承精一傳克紹唐虞芳
猗歟嘆

日躋復見商成湯穆穆歌敬止亦有周文王嗣武建皇
極周德日以昌聖神相繼作治道彌昭彰所以八荒內
淳風浩無疆唐虞既遼邈三代亦荒涼諸侯紛僭竊列
國互爭強危舌利如戟巧言媚如簧孔孟思濟時輒迹
周四方徘徊無所遇懷寶徒悲傷陵夷至嬴氏不啻豺
與狼治道已蕩然淳風亦淪亡芒碭龍一奮仗劍扶頽
綱所悲雜霸術垂統未甚良累葉稱善治不過臻小康
東京既失御羣雄起陸梁伏龍徒奮迅鳳雛空翱翔天

意挽不回炎精竟無光六朝迭興廢四海日擾攘忽生
龍鳳姿唐祚開晉陽奈何同氣親戰血流宮牆北宸穢
宸極塵聚瀆天常治道雜王霸奕葉多昏狂比之炎漢
時已不相頡頏回首視唐虞深淵與穹蒼有唐既迄運
劉石遂披猖中原數千里幻作征戰場皇天命賢主揮
戈掃欃槍陳橋屬猪人遂著龍袍黃立國尚忠厚頗勝
漢與唐惜哉三百載教化未汪洋遂令三代前淳風竟
茫茫端居茅簷下感此心傍徨仰天動長吟浮雲自悠

揚

望雲思親為太學生李某賦

悠悠天際雲飛遶江南路遊子行見之徘徊日將暮飛
雲本無心於人亦何與為念白頭親遠在雲飛處丈夫
身許國私恩邈難顧鄉山杳靄間可望不可赴安得雙
羽翰高飛逐雲去我亦別庭闈接武金鑾署為君動長
吟潛焉淚如注

秋鴻

萬里無矰繳江湖得自由
遠依南地暖因覺北天秋
疎雨投荒浦殘陽度遠洲
叫霜催落葉送冷入征裘
影亂風橫塞聲寒月滿樓
蘆深依晚渚稻熟下平疇
孤館初驚夢新霜欲上頭
帛書無復繫夷虜戴宸旒

畫梅四首為焦璠中書賦

風梅

南枝春意深繁葩吐奇馥
東風一夜來吹落滿庭玉
樹底莓苔紋漸失舊時綠
騷客曉開門忽訝飄滕六

烟梅

天然玉雪姿托根依絕巘縹緲隔寒烟不辨春深淺
亘人愛桃李清標識應鮮天公似有意欲遮塵俗眼

雪梅

玄雲畫冥冥雪滿空山裏百卉淒以腓無復舊紅紫
獨有山中梅凌寒花韡韡分明烈士心不隨頽俗靡

月梅

我家閩山下種梅遶衡廬林梢晴月上風景如西湖
孤

吟無與和
酌酒招林逋
迺今墮塵網
慚愧觀畫圖

送陳廷美歸省錢塘

同年邵維貞索

仗劍別鄉土
壯遊入長安
丈夫志四方
胡為復言還
悠悠天際雲
長遠高堂間
遊子行萬里
感之懷故山
淒風振林木
朔雪滿河關
緬懷鞠育恩
豈憚行路難
我亦久為客
膝下思承歡
便欲同翱翔
未得凌風翰
河橋送君去
佇立空長嘆

送林彌顯還莆

東風一夜來吹綠都門柳柳下酌清尊送此平生友人
生穹壤間浮萍寄淵藪飄泊偶相逢隨風仍左右與君
結同心荏苒年華久我竿濫見收君瑟猶不偶人事苦
難齊紅塵異奔走丈夫抱奇器終豈居人後窮通付蒼
天且盡尊中酒龍泉吐寒芒奕奕射牛斗拂袖登紫駟
慷慨各分手行行到故鄉升堂覲慈母獻壽舞爛斑春
風生戶牖時復會親朋攀躋雲外阜林間卧枕肱花前
笑開口當思曲江頭春色年年有早振凌風翰勛名期

不朽勿令故鄉塵容易白人首

壽彭母七十

天地三陽泰慈闈壽域開華年盈七袞寶婺燭三台慈
竹清陰藹萱花春意回堦庭蘭掩映霄漢鳳綈繇石髓
陳瑤席瓊漿泛玉盃香浮金鴨霧樂震畫堂雷王母驂
鸞下麻姑駕鶴來相期長不老滄海看飛埃

畫雀為黃體行理問賦

飛龍御九重和氣充八極含生非一類盡圍雍熙域黃

金匱要略卷七
崔亦遭逢俯仰性情適上林深復深終年無彈弋渴飲
御溝水饑餐太倉粒朝陽阿閣上每共鸛鷺集微生得
如此不識伊誰力賸有酬恩心銜環定何日

雨後觀漲

連日雨新晴諸溪水盡生氣蒸天色暝浪滾雪花明鷺
渚看全沒虹橋覺漸平朝宗奔電影觸石殷雷聲山近
涵空翠雲低接太清渡頭人不到空有畫船橫

翰林院南新闢三圃

玉堂有隙地清曠當南隅方春度微雨草色成荒蕪今
年闢三圃予以種嘉蔬開雲作畦壠引水疏溝渠縱橫
數十品生意盈堦除朝來零露灑綠葉清陰敷菜根有
真味頗勝梁肉腴嚼之苟不厭百事俱可圖偉哉信名
言千載當師模

移菊

菊本君子花俗卉良難偶所以古哲人品題作佳友玉
堂老儒僊愛此出塵垢移種玉堂陰翠色滿牕牖托根

咫尺天雨露滋培厚繁英吐黃金端不負重九羣僊休
沐暇足泛黃封酒古稱菊潭水飲之即黃耆願言采幽
芳以介君王壽

羅湖古峰漁樵為新淦嚴武賦

渺渺羅湖波蒼蒼古峰樹中有一幽人占斷湖山趣有
時駕扁舟蕩漾湖中去得魚即呼酒醉卧雲水暮有時
操斧斤笑指峯頭路天風吹浩歌泠泠出烟霧雲夢繁
淮陰長沙謫賈傳軒冕信為榮覆車尤足慮豈若老湖

山安行無窘步

送黃石體行任湖廣副理問

君從故鄉來握手長安道滿眼盡交遊何如同姓好旅
館幸連牀朝夕資論討時復酌金罍花前共傾倒相愛
見天真賴以開懷抱昨日拜新恩錦衣炫晴昊笑買楚
江船勿勿出蓬島離尊悵初盡烟起河橋草揚帆入烟
去滄江空浩浩感君平日情憂心慙如擣何以慰渴饑
貞白期自保

代陳憲副贈原都憲用祁主事韻

方岳當齊魯行臺正百官元臣加節鉞寵命出金鑾河
內仍留寇荊州幸識韓冰霜歸政府風月在詩壇展也
才兼德猗歟猛濟寬持平良獨易負重豈辭難部屋光
還照陰崖氣不寒盤根資利器凋瘵藉靈丹固圉經年
淨苞苴絕夜干泰山崇地位渤海息波瀾王事勞行役
親闡闕問安暫辭東土鎮歸奉北堂歡天上頒鸞詔庭
前拜翠冠瑞萱明綉闥慈竹蔭雕闌萊彩情方洽潘輿

興未殘鄉閭誇畫錦人吏候歸鞍繡斧欣重覩湖山為
改觀樗才叨部屬風裁仰雲端久荷箴規切都將肺腑
刊詠歌追吉甫付與史官看

題徐若川秋官山水圖用王諫侍御韻

屋上白雲閒屋下流泉好遙山幾片青出沒林樹杪浮
生墮塵網局促何其小豈若山中人悠然豁襟抱林春
花氣濃谷暖鶯聲早安得往從之談玄坐昏曉

送彭延廣歸安成

御史延尉之弟也奉其母來
視其兄至是復奉其母歸鄉

纔奉潘輿來復奉潘輿去來憶紫微花去憶靈椿樹來
去肯辭勞孝友夙所慕雁聲催早寒關河秋色暮仗劍
出都門愁心闕去住秋風五兩輕揚帆入煙霧行行到
鄉山親舊欣相顧稱觴一樂堂滿堂春煦煦行看太史
占西江德星聚

題四景山水圖為李生時爵賦

春意入遙山漸覺燒痕綠驅犢向東皋一犁雨初足田

園樂事多吾將返吾轂

右春景

溪亭雨新霽青山滿前軒煩煬喜暫息正襟味道言此

中有真意富貴何足論

右夏景

風高霜葉稀潦盡寒潭碧斜陽罷釣歸濁酒聊自適冷

笑世途人勞勞不遑息

右秋景

夜來積雪深曉覺寒威逼呼童棹扁舟蕩漾安所適隔

溪有寒梅欲訪春消息

右冬景

同昭武劉太守高揮使諸公遊萬峰菴

亂山如聚米獨擁一峰高幽勝元無匹登臨豈憚勞千

林澄霽色萬里見秋毫溪漲紫寒碧松聲殷怒濤人烟
連郡郭禾黍帶林皋清世欣無警豐年慶屢遭羣公多
暇豫尊酒一遊遨詩思慚予拙茲來亦覺豪

題昭武高揮使鍾呂二僊圖和謝大叅韻

我聞二僊翁翩然拂塵服携手問還丹世事瞋雙目丹
成共遐舉離人立於獨茲事蓋窈冥有無未能卜而我
獨愛翁蕭散青山麓不榮文錦裳不貴黃金屋秋雨飯
胡麻春風羹杞菊綠醅釀初成開尊味醲郁興來即傾

倒枕藉山中宿金谷花戎戎長安車轆轤天道有乘除
得失互倚伏翁應達茲理優游在空谷安得往從之雲
山並幽躅

一齋為永康黃肅賦

平地欲為山所積非儋石高丘欲掘井胡能計尋尺為
學正如斯孜孜當不息持之亦有要曰惟主於一所以
古哲人乾乾以終日講學窮至理飭躬崇令德習俗諒
不移他岐豈容適萬理忽昭融聖域可優入窮則善其

身達則行於國俯仰天地間能事從此畢黃生志希賢
顏齋警晨夕吾將考其成勗哉慎無斁

題四景山水圖

白頭杜陵叟乾坤一詩豪看山坐芳草尋春訪緋桃一

尊不自慰奈此時繹騷

右杜甫
遊春

笑渠新著花幽賞竟朝夕所喜契吾心寧徒玩其迹遺

說炳丹青誰能繼真識

右濂溪
愛蓮

彭澤賦歸來托身籬菊中夷齊迹雖異商周時則同世

無漢昭烈千載空卧龍

右淵明
愛菊

清夜入孤山梅花伴幽悄興寄香影中詩成水月表松

梢孤鶴鳴不覺千山曉

右逋仙
愛梅

浣靈軒為李德馨方伯賦

人心本虛靈物欲有時蔽所以古哲人浣之不容置動
靜交有養內外互相制如水決其污如鏡去其翳一疵
不復存萬理咸森備事物紛然來順應無少戾彌綸參
贊功畢竟由此致李公學古徒顏軒恒自勵日新功已

勤非徒美觀視施於政事間動與古人契功業日以隆
未測其所至吾將觀其成勗哉慎毋替

題畫竹二首

我昔愛此君手植清溪曲春雨長龍孫森然數竿玉風
搖疎影長日轉新陰綠披襟趁晚涼嘯歌淨炎燠年來
亦何事東馳復西逐披圖見此君俯首愧塵俗

右晚涼

藹藹碧琅玕托根傍苔石挺拔霜霰餘蒼然含正色況
復新雨過凝凝增潤澤偉哉衛武公學已躋聖域淇澳

播聲詩托此比其德有志希聖賢茲圖視為則

右甘澤

擬古

故人千里別遺我雙干將其鞘飾鞞琫其刃生寒芒鞘
以示韜晦刃以明堅剛時行即徇義時止當深藏雌雄
喻同心以最長不忘

題畫

紛紛浮世上舉眼皆塵俗蓬萊杳何許但見雲海綠呼
童抱瑤琴青山縱遐矚欲彈山水調和以陽春曲緬懷

鍾子期百身恨難贖皓月幸無恙流光滿林麓夜夜照
孤琴庶以慰幽獨

和丁石崖太守贈箕陽陳憲副致政詩六首

貪夫溺忘返達人自不羈時行施惠利時止娛詩書而
況故山下猶有舊田廬及此身強健不歸待何時

二

鸚鵡在雕籠日食非不腴何如林間鶴棲老蒼松株先
生早賦歸酌酒舞且飲彼哉憂得喪役役真鄙夫

三

羣賢際昌運衮衮乘風雲先人獨何事超然離人羣
鵲以翠而斃膏以明自焚偉哉桑榆翁東籬醉斜曛

四

春水綠浩蕩春山翠崢嶸登臨縱吟賞浩然發幽情因
悲華要客氣勢如雲橫長安如奔走紅塵沒簪纓

五

丈夫進退間從容乃為宜進退或窮迫寧不為世蚩賢

金史卷之六
卷七
哉漢二疏清風藹今茲先生繼芳躅高節巍巍而

六

閑行引孤鶴復與瑤琴俱山水一會意日晏猶忘鋪始
知天壤間一閑真足娛

林節婦詩

婦道在順從而以夫為天哀哀林節婦所天夙棄捐慟
哭絕復甦撫膺淚如泉一死諒不惜遺孤誰為憐仰天
誓白日一節期自全鉛華悉屏棄憔悴徂芳年願為松

與柏槁死深澗邊肯學桃李花岐路爭鮮妍縫紉秋月下
絡緯寒燈前辛勤課遺孤及時理青編空閨四十載金石
同真堅有子植先業有孫紹儒壇所天如有知泉壤
應欣然

琴書真趣為三山王用忠賦

伊人愛文雅夙志不外慕琴書日自娛蕭散澄神慮寶
鴨風微薰藜燈雨初度膝上罷絲桐床頭披竹素煩襟
日以清至理日以悟俯仰天地間悠然有真趣予亦契

茲懷苦被微名誤勞勞西復東流俗共馳騫有琴度高
閣有書閑深戶紅塵汨天真欲避不能去安得謝浮榮
相從竟朝暮

輓餘姚毛處士

號竹溪
主人

越山有幽人高隱在巖谷適興有詩書驚心無寵辱高
風蓋一鄉亦足振頽俗人生隨化遷百年蛇赴壑送死
人所悲送君能勿哭泠泠越溪水蕭蕭溪上竹主人去
不返水竹空遶屋贏得慶源深化作蘭與玉春風滿堦

庭藹藹揚芬馥九原君勿悲人間萬事足

題鍾處士梅溪卷

國子生東廣
鍾轅之父也

若人愛幽雅結屋清溪曲溪上種梅花幾株深遶屋窮
冬時沍寒雪霜錮林木惟茲保太和繁花粲如玉主人
日無事花底縱吟目徙倚襲寒香拍拍春滿腹世人逐
浮榮奔走不停轂誰知方寸心中有塵萬斛曾如溪上
翁俯仰無羈束何當謝簪纓相從在林谷酌茲溪上水
一洗人間俗

題四景山水圖為仙溪林廷寬賦

春景

積雨曉初晴
林巒翠如沐
鵲知陽春
桑巔催布穀
騎驢者誰子
尋芳縱吟目
何日脫名韉
青山並幽躅

夏景

屋上有青山
屋下有流水
宇宙正薰風
荷花香數里
窓下看書人
應是瀟溪子
安得往從之
靜觀無極理

秋景

幽人隱者流，翛然不外慕。空江罷釣歸，寂寞秋山暮。開樽風滿樓，吟詩月當戶。回看聲利場，勞勞正行路。

冬景

我昔謫湖湘，凌冬出畿甸。驅車隴阪間，風雪朝盈面。六合亘頑雲，九疑悵難見。披圖感舊遊，流光去如電。

芳草吟送李茂容歸莆

都門積雨晴，芳草增新翠。岐路送君行，感之發長喟。與君客京華，芳草幾榮瘁。草色自年年，王孫歸未遂。高堂

傷別離
昕夕幾行淚
客心自淒然
況與芳草對
君今別我去
所恨不同隊
安能若芳草
處處隨君騎
憑君向高堂
寄聲一相慰
遊子倦風塵
久動鄉關思
早晚謝簪纓
歸臥雲中寺
衆草歇芳時
行人會當至

籌亭為高都憲賦

古有張子房亦有趙充國
一則籌廟堂一則籌邊域
公才今罕倫直與古人匹
蠹彼狐鼠輩出沒長江側
殺人以橫行終歲為民賊
公名簡帝心爰命往誅殛
孤舟時

泛泛來往凌空碧幽亭構舟上軒敞含虛白因以籌為
名于焉勵所職蕩滌狼烟清指顧鯨波息干將斫朝菌
曾不勞餘力聖皇圖致治日昃不遑食煩公運一籌俾
復唐虞日咄哉茲小醜何足勞區畫

送孔詹事考績之京

代孫寺丞賦

宣尼德澤長直與乾坤並委祉及雲仍賢哲相輝映君
生千載後亦復鍾其慶黃甲蜚英聲青瑣司諫諍春宮
資贊翼啓沃攄忠藎棘署佐祥刑庶獄稱明慎宸衷猶

簡念家學承先聖寵擢侍經筵眷遇日彌盛君心益感
激朝夕圖報稱批鱗發謹言誓將裨聖政聖明天地量
詎肯遺忠正為念漢陽民連歲遭饑饉遂命汲長孺臥
治甦民病一朝懷舊弼旋復錫恩命重拜舊時官來覽
金陵勝人生若浮萍聚散嗟無定昨日幸相逢詩酒發
佳興今朝復分手奏績重趨覲九重圖治勤寤寐思英
俊定見沐殊恩金甌覆名姓努力效嘉猷致君邁堯舜

效古十九首

握手與君別萬里從此辭悠悠道路長惻惻中心悲白
日西山沒流水東海馳東西各異勢會合良難期明月
有時缺思君長不絕茫茫春雪深道路沒歸轍驅馳力
已疲憔悴髮已白君心但自保豈敢怨離別

二

浮萍逐水流落絮隨風起青樓有佳人自矜容色美瑤
箏弄玉纖清歌呈皓齒堅貞不自持托身遊俠子一朝
遭棄捐飄飄無定止

三

落花委蒼苔飛絮沉綠水榮華倏忽間人生亦如此今
日白髮翁前日紅顏子何事長奔波終日不遑已駕言
秣吾馬遊戲長安市層樓百花中高闕五雲裏冠蓋集
芳園歌鐘喧戚里綺羅艷春風夾道香塵起人生俱作
樂不樂徒為爾

四

高堂集嘉客濟濟皆同心珍羞列綺席芳醕傾銀瓶慷

慨發浩歌鏗鏘鳴瑤琴素懷邈難寫寄此絃歌聲於中
有真趣誰能知其音光陰急如箭倏忽成古今失今不
作樂白髮日相侵窮通順吾命任彼浮與沈

五

中城有危樓萬象勢盡低飛簷煥華采傑棟凌雲霓樓
中有少婦良人久乖睽有時歌聲起秋風共淒淒秦箏
清且哀調與歌聲齊宛轉不能已青天紅日西眼前孰
知音絃歌徒悲悽却羨比翼鳥一雙長並棲

六

歲暮羣芳歇
梅花開滿林
殷勤折南枝
將以寄同心
故國萬餘里
寒香徒自深
引領獨徘徊
青天日西沈

七

斗杓復建寅
生意回枯朽
輕紅點檻桃
新綠上堤柳
俯仰八紘間
融融煖如酒
感此念故人
天涯離別久
憶昔初見君
論交期皓首
雲泥一朝異
曾不念攜手
雁飛必呼羣
鶯鳴亦求友
物性尚如斯
君心何獨否

八

鳳棲在碧梧魚游在綠水婉孌相因依始終長若此初
與君結好期與君偕老胡為棄前盟隔絕千里道引領
望軒車山空歌浩浩君若方春陽妾若幽谷草陽光不
煦嫗草色將枯槁惟有貞白心為君長自保

九

凌晨步庭外惟見柏森森風霜任搖落翠色長自深攀
條寄遠客表此一寸忱所重不在物以勗歲寒心

十

皎皎織女星獨處河之澳頻年織雲錦燦爛盈杼袖剪
裁勞玉纖將與牽牛服欲渡河無梁耿耿亂心曲馳情
獨悵望但見河水綠

十一

驅車早言旋胡為事遠遊韶華如昨日金風復颼颼百
年駒過隙人生難久留惟思早立身可以傳千秋光陰
苟蹉跎倏忽委山丘去去從此始努力慎勿休

十二

秋風起天際商聲滿寒谷白露已為霜曉氣清且肅人
生無百年奈此光陰速去者日已多來者日已蹙何不
暢懷抱而乃長刺促齊宋多名姬羅綺生芬馥持身良
不苟頻年保貞淑清商中夜發激烈鏗金玉慷慨振衣
裳殷勤脂車軸願為高崗鳳飛向梧桐宿

十三

瞻彼北邙下累累總丘墳古道翳榛莽老樹含風雲晨

卷七
昏樵牧歌來往狐兔羣白骨亦已朽寧復有精魂人生
天地間暫寓難久存年命乃有限嗜欲胡無垠營營苦不
足東西日紛紜一朝委山丘貴賤寧復論不如謝塵鞅
笑傲雲水村

十四

死者不可作生者尚未衰生時不共樂死去復難追瞻
彼南山麓丘塚何累累感之思故國旋歸苦無期登高
獨徘徊耿耿徒傷悲

十五

人生雖百歲七十已云稀如何一身微乃為千載思有
酒即相親于以樂青春區區逐微利徒為受苦辛君看
醉鄉人乃獨全其真

十六

西風起林末物候何淒涼芙蓉銷華澤蘋蓼揚輝光良
人久離別關山阻且長新愛有佳人舊歡從此忘賤妾
若葵花良人若太陽太陽雖轉移葵花長仰望昨宵魂

夢裏忽到良人傍攜手共言笑歡樂猶未央須臾復不見拊心重徬徨本期鴛鴦與鴛一雙長翱翔棄捐今若此有淚空沾裳

十七

韶華倏已去朱火復相違涼飈振林木颯颯商聲悲故人天一方數載隔容儀忽將金玉音遠寄鱗鴻歸感此情意厚佩服良無遺關山既修阻物候復淒其佳期不可即耿耿徒相思

十八

故人隔天涯萬里情尚切遺我金錯刀把翫中心悅金
環月團圓白刃水瑩澈刀以勗直道環以喻不絕佩之
永不忘疇能使離別

十九

東風入庭樹忽動閨中思春去今復歸遊子獨何之瞻
彼天壤間萬物咸熙熙孤妾獨徘徊悠悠雙淚垂風霜
但自保會面良有期

題鸚鵡

幽禽何處來飛向琅玕樹金眸爍晴曦鮮羽濯朝露春
風紫禁中奇音數聲度鸚鵡噤無言花間屢驚顧

題青鳥

青鳥自瑤池來向瓊枝息清風散好音旭日耀奇色借
問蟠桃花何時重結實欲采祝吾親團圞躋壽域

朱軒文集卷七

欽定四庫全書

朱軒文集卷八

明 黃仲昭 撰

五言詩

題畫山水扇

結屋蒼松裏悠然趣不羣
柴門扃濕翠蘿逕入寒雲
山轉紅塵隔溪橫碧靄分
煙霞應莫戀天上有明君

題萬壽觀萬花園殿後軒

金定月令卷八
碧殿臨幽沼開軒水氣清紅蓮饒曉色綠竹作秋聲萍
散魚吹浪林喧鳥弄晴僊家良在此何必問蓬瀛

送庶吉士鍾美宣乃叔還番禺

遠謁鑾坡署殷勤訪阿咸羊城勞客夢潞水問歸帆荔
子紅垂屋榕陰翠遶巖品題應有句珍重示來緘

送楊汝介奉其父考功公之命歸省祖母

遠奉嚴君命重闌問起居異鄉頻有夢故國久無書潞
渚冰消後都門酒盡初愁心闕去住臨別重躊躇

圃東新井

玉署井初成寒泉一鏡平潤滋蒼蘚茁色映翠梧清澄
碧涵天影虛圓浸月明何由分涸轍枯鮒總回生

愛蓮為潞陽戴景元賦

蓮自瀟溪後先生獨愛之畫船頻載酒彩筆每題詩佳
色看偏好幽香嗅更宜箇中有真趣浮世幾人知

題崆峒拱壽圖壽林文華先生母

雲路雙丹鳳慈闈獻壽觥養分天祿厚舞著錦衣輕南

極乘雲降崆峒駕鶴迎華筵申頌禱同看海塵生

謁延平書院二首

九峯分一脉遺廟竝當中橫翠軒猶在濯纓亭已空溪
山閒霽月草樹自春風僊梵爭華侈傷哉吾道窮

二

先生不可作千載仰儀刑道脉承伊洛心傳在考亭池
涵新漲綠碑蝕古苔青墜緒今誰續斜陽草滿庭

和駱順庵邑博雨中見懷韻

良晤連朝阻憑高望泮宮煙雲迷旦暮樓閣隱青紅溪
漲千峰雨蟬鳴一葉風知君能念我兩地思應同

遊昭武西塔寺和劉太守仁甫韻

偶同登古寺樓閣夕陽邊列雉低連樹遙山翠倚天勞
生成底事客路又經年只合還山去塵纓濯澗泉

遊昭武福山寺

野寺峰巒合雲扃畫闥寥虛窓臨樹杪曲閣遶山腰何
事勞車馬頻年走市朝却慚林下衲閉戶草蕭蕭

拙戒吳方伯亭成翠渠有詩寄題因次韻二首

聞說吳方伯幽亭構已成
四簷深樹暝一雨小池平
鷺依人宿蓴鱸約客烹
良遊嗟未遂幾度夢中行

二

一段崆峒景何須訪廣成
春增晴野綠雲補亂山平
酒泛黃花飲茶分活水烹
芳鄰如可借杖屨日隨行

送韋提學致仕還家二首

諸生沾化雨臨別思茫茫
經濟違初志蓴鱸憶故鄉
琴

隨孤鶴去鴻共片雲翔一笑忘言處還家菊正黃

二

老我方投笏先生復掛冠世途機穽險吾道應酬難
蝸角間爭懶槐柯短夢闌扁舟欣抵岸滄海任狂瀾

山亭為龜塘廖氏應修賦次周翠渠韻

小亭依水竹山色共霏微散帙雲浮几彈琴月在幃
鷺行簫羽鷗鷺暫忘機一榻期相借風雲同咏歸

題坦齋所作小畫次周翠渠韻

孤艇斜陽外羣峰紫翠橫水光浮日色蕩漾一川明
邵武黃溪鋪左有飛瀑數十丈懸石崖如布

山上白雲深雲中出飛瀑回看不見源疑從天上落

遊囊山寺追和柯竹巖先生韻四首

一徑斜通寺蒼松帶碧溪樓臺晴日麗雲海暮山低亭
擁蒼霞暝窓橫翠靄齊老僧誰得似長伴白雲棲

二

吾郡多奇勝都無讓古囊松風回爽籟巖桂散天香把

酒鶯啼樹橫琴月到床高情邈難寫一笑晚山蒼

三

寺遠人稀到巖扉盡日扃鳥窺山殿供風亂石床經巢
鶴松枝老潛蛟澗水腥同遊總知己相對眼俱青

四

遊倦還高閣憑闌思轉豪雨收山擁翠潮至海增濤遠
戍孤煙淡平原獨樹高勝遊情不極重擬約同袍

登辟支巖追次柯竹巖先生韻二首

層巖窮勝覽舉首近晴空城郭斜陽外村墟斷靄中野
水連雲白殘霞映樹紅東南天更遠極目沒冥鴻

二

造化鍾靈秀閒雲自辟支泉源分處遠巖穴鑿來奇地
僻藤埋徑年深蘚翳碑幽禽迎客語繾綣似相知

登九僊觀舒嘯臺

臺在三山九仙觀崖石下初
歲榛莽成化丁未始闢為臺

榛莽新芟闢天然數仞臺烟雲連睥睨殿閣俯崔嵬遠
岫橫江斷寒潮到郭回登臨一舒嘯天地旅懷開

鄉貢進士三山王士奇大父母挽詩二首

良玉堪瑚璉宏材中棟梁雲衢淹素志旅夢熟黃梁書
閣芸香散吟壇草色荒賢孫高擢第應是慶源長

二

淑德由天賦高堂足母儀梨雲飛夢杳薤露些歌悲雙
壁同玄室諸孫見白眉徽音應不朽太史勒穹碑

往德安過東林寺讀始祖唐御史公詩韻六首

廬阜稱茲刹乾坤幾許時題詩憶吾祖覽勝愜幽期鹿

飲清溪水鶴巢古樹枝我來訪蓮社山色映清池

晉陶靖節

與陸靜修等十八人結白蓮社于此

二

東林聞自昔夢想已多時頗喜茲行便聊償夙所期苔
荒繙貝處劫化偃松枝贏得笑渠在年年發舊池

謝康樂嘗

繙譯佛經鑿池于此祖詩繙譯如曾見白蓮開舊池古松晉時植祖詩松偃數朝枝

三

經過聊駐節正值浴沂時野鳥如相迓雲山似有期水

清泉傍石林密樹交枝怪底坐忘去幽亭俯碧池

四

下馬日停午陰雲解駁時縱觀須盡興重到恐難期
花雨紅飄逕松嵐翠滴枝前峰高見塔指點是天池

寺前正對

廬山天池峯峯頂有寺寺前有石池寺後有浮圖高出林杪

五

縱忙須暫住周覽更何時山色千年在人生百歲期
香斜風入榭花落鳥爭枝瀾茗澆吟吻山僧汲小池

寺有泉出

石間極清冷寺僧斃石為小
方池作亭覆之名曰玉壺冰

六

未了公家事匆匆少暇時偶因逢老衲聊共話心期倦
驢悲塵卓痴鳩憶故枝君恩猶未報行路敢差池

再經廬山東林寺又用始祖御史公韻賦六首

昔年曾過此猶記暮春時驄馬重來日隙駒三載期雲
間經雨岫花發向陽枝春草撩詩興分青入古池

二

青山如有待不改昔年時
重到寧非幸佳遊不負期
亂雲生石罅一鳥轉花枝
昨夜知經雨幽庭水滿池

三

慧遠因陶令高名著昔時
虎溪同笑傲蓮社共襟期
故址更新宇喬林非舊枝
十年遺跡在惟說兩荷池

四

問道潯陽郡諸生候幾時
未窮殘日興仍擬復來期
霽景酣春意紅芳間綠枝
山中春社過飛燕亂差池

五

徙倚看奇勝乾坤雨霽時林巒含喜色花鳥似前期晴
竹黃金影新梧碧玉枝幽亭事事好不獨瞰清池

六

山水重看處韶華正麗時勝遊良自慰浮世亦難期鳥
矚齋僧飯猿攀飲澗枝所嗟公事迫未得看天池

大雨雪六首

時會同寅飲憲副吳公有賞雪嘗
新酒吟風集故人句因足成律

賞雪嘗新酒吟風集故人歲窮雖覺凜道台亦如春霜

鬢年華邁雲扃歸夢頻明年復今夕未卜更相親

二

賞雪嘗新酒霜臺散晚衙
杯乾情自洽風勁勢尤加
入面回春意開
牕訝月華豐稷應有象
佇聽頌汙邪

三

賞雪嘗新酒初昏喧漸沈
從容論世事慷慨發豪吟
蒲辰清光遠江湖憂念深
蒼生猶凍餒何以慰吾心

四

賞雪嘗新酒同寅喜盍簪跳珠初泚泚飛絮漸毵毵高
論兼今古清歌雜笑談老予慳飲量今夕亦沈酣

五

賞雪嘗新酒空庭夜色明偶因公事暇聊適片時情紫
塞烽猶警黃河水未平迂疎無寸補空有二毛生

六

賞雪嘗新酒忘形孰主賓心交非市道情洽見天真民
俗猶趨薄儒風未返淳一尊應暫適終合乞閒身

次韻贈提督踏量屯田程主事

四牡歷丘墟民風隨地書逢人詢敝政計日趣輶車兵
欲儲糧餉民思奠室廬使君今處分須體聖明初

江湖壯遊和李侍御尚絅韻

仗劍別鄉土乾坤欲通行憑高能作賦弔古獨傷情草
沒唐虞甸苔荒豐鎬城經遊何地好我亦濯塵纓

送方君子大赴春官二首

才子氣如虹雕鞍白玉驄攜書萬里外獻策五雲中豹

變南山霧鵬搏北海風此心逐流水一路與君同

二

高折蟾宮桂殷勤謁聖君論交感知已對酒惜離羣
劍浦舟搖月梨關路入雲庭闌回首處離思漫紛紛

送李君唐英赴春官二首

秋雨度江城攜書上帝京雲山橫去路烟草感離情已
冠棘闡選還魁蘭省名他時霄漢上珍重樹芳聲

二

感別情偏切離筵酒易酣孤舟搖霽月一騎入晴嵐
戀闕心懸北思親夢繞南明朝倚樓處雲樹思難堪

送林君李厚赴春官二首

嚴翁黃閣老君復紹清芬月窟攀高桂天庭謁聖君
征帆衝暮靄驛騎入秋雲他日青霄上相期更策勲

二

欲獻天人策殷勤覲九重朝陽鳴彩鳳瀚海起潛龍
錫宴宮花豔題名御墨濃嚴翁調鼎暇獻壽啟黃封

秋夜回文

絃管雜歌謳坐間竹簟幽蟬聲幾樹暝雁陣一天秋烟
寺僧敲磬月樓更轉籌年華任醉飲興適即忘憂

梨關讀林九牧遺刻

昆季同經此題詩在翠微要穿楊葉過方向嶺頭歸姓
字終聯擢山川與有輝至今苔未蝕讀罷思依依

楓嶺

楓嶺度征軒臨風思惘然蒼松悲唳鶴深谷慘啼鵲泉

雜山頭雨人穿樹杪烟庭闌何處是長望白雲邊

客中四時詞

花影隨日移鳥聲逐風度索居元寂寥祇恐韶光暮

二

暑雨潤吟牋薰風清綠綺新蟬欺客愁庭槐吟不止

三

荷落一池風菊開三徑雨無窮離別懷況聽寒蟲語

四

飛雪透疎櫺隆寒襲重被鄉心觸景生惆悵難成寐

梨嶺道中十八首

古樹吼寒風危峰映夕照對景獨傷懷厭聽哀猿嘯

二

翠壁瀉寒泉蒼林棲薄霧日暮白雲深忘却闕關路

三

楓葉飄殘紅松林生寒碧役役世上人奔走不遑息

四

深林蔽夕陽寒泉瀉蒼壁雙親久別離瞻雲情固極

五

峰高覺澗深山轉疑路絕村遠投宿遲松梢掛新月

六

地暖樹未凋臘殘梅欲放無端景物奇妝點詩懷壯

七

孤鶴唳蒼松哀猿嘯寒月遊子久未歸對景鄉心切

八

鳥道碧苔封斷橋芳草沒峰危似虎蹲樹古如龍屈

九

古寺倚雲岑幽亭闕鳥道肩輿行處高西風落人帽

十

哀草遶山深暗泉緣澗響岩窵嶺路高白雲隨足長

十一

花發不知名水落石潭響山川爭秀麗吟餘足清賞

十二

樹擁碧山深水急寒灘淺佳景難收拾新詩謾裁剪

十三

野燒明荒山寒林覆深澗風景役吟魂忘却浮生嘆

十四

白石積蒼苔青林雜紅樹翹首望鄉山雲深知何處

十五

風飄野菊香霜壓山楓敗客思誰能寬賴有同袍在

十六

溪轉板橋斜峰迴鳥道曲山泉最可人清音漱寒玉

十七

斷霞橫蒼山淡烟迷遠樹草傍幽泉生冰凝如玉筋


其八

花開不為春路濕非關雨空谷一聲傳山川學人語

夏夜宿萬壽觀萬花園次友人李唐英韻

夏夜琳宮裏開軒面面清池幽荷簇錦庭淨月鋪瓊修

竹弄晴影疎松起籟聲無端青草夢盡向此中生



朱軒文集卷八

欽定四庫全書

集部
朱軒文集卷九
十

詳校官中書臣賈鉞

中書臣劉源溥覆勘

總校官庶吉士臣倉聖脉

校對官中書臣吳甸華

謄錄舉人臣張曾秀

欽定四庫全書

朱軒文集卷九

明 黃仲昭 撰

七言詩

送北閣林先生之任潼川

先生自是儒中彥才華磊落人爭羨講道鄉園淑後人
桃李紛紛栽欲遍執經我亦曾相從菲才深荷開顯蒙
有時程門立寒雪有時馬帳談春風徵書忽起沖霄鶚

我亦乘風遡寥廓相隔雲山幾萬重相思烟草幾迴綠
去年謁選來都城相逢一笑春陽生除書忽從天闕降
教鐸又載潼川行潼川迢迢在何許落日孤舟發汀渚
心逐瞿塘峽上雲夢殘白帝城邊雨講堂沈沈白晝長
滿池芹藻飄清香化雨時來一揮灑教澤到處皆汪洋
歎我年來日茅塞那堪復與先生別後夜儀刑不可親
夢魂長遶巴山月

送同年陳宗調榮歸

六龍御極綏八荒勵精圖治求俊良陳君自昔工詞章
倒挽文星歸筆鉞翩然掉鞅馳文場凌風一箭誇穿楊
聖恩與海同汪洋錦衣特許榮故鄉五花駿馬青絲韁
春風蹀躞岐路傍關山戢戢閩水長此行山水俱增光
況復慈親在北堂天開壽域殊未央上堂拜獻紫霞觴
下堂戲舞斑斕裳萱花玉樹相輝煌堂中藹藹春無疆
丈夫功名須早償莫教玄鬢生秋霜鳴珂竚待歸巖廊
披肝露膽酬君王上令治道躋虞唐下令黎庶臻平康

龍章指日重顯揚千秋萬古長流芳我家雙親七十強
別來甘旨無由將君行未得同翱翔引涕空望天南方
千里萬里雲茫茫

送張先生進實錄回任河間得尊字

三山張
績也

先生問學推淵源才名早已高閩藩振鐸榮沾雨露恩
春風桃李花盈門王畿史牒推討論書成親捧朝天閣
盍簪幾度經黃昏笑談滿坐春陽溫朔風吹雪飄塞垣
頑雲一色連川原勿勿復駕南歸轅霜蕪寒柳堪銷魂

行潦難留瀚海鷗雲霄萬里終高騫此時重掃京華軒
浩歌共醉黃金尊

壽萱堂為宋仲和司訓賦

鏡裏青鸞飛去早冰玉襟懷長自保玄髮年來變成縞
鳳雛總喜風標好欲慰慈親躋壽考堂前特種忘憂草
燈燈繁花映晴昊對此慈親春浩浩一雛朝陽振文藻
新沐天恩出蓬島錦衣特訪鄉園道獻壽流霞傾瑪瑙
日向花前申頌禱長對慈親勿枯槁遐壽直同天地老

送余先生教授淮府

我家嚴君宰邑時先生載道來為師氣味相投即相契
直與管鮑同襟期我時亦侍嚴君側山斗光中識顏色
滿懷拍塞皆陽春就之如入芝蘭室嚴君解印賦歸與
先生去曳王門裾河梁馬首東西別幾迴江上丹楓疎
年來我作金鑾客幸遇先生朝帝闕典衣共話十年前
浩歌醉吸清尊月月圓月缺苦不常人生亦恨多參商
明朝又向河橋別離懷迴逐煙波長官閒時會賓僚宴

山水遙知品題遍江雲渭樹倘相思春風好寄歸鴻便

送來陽謝文善知無為州

同年文祥之兄也其父亦嘗知是州

尊翁昔作無為守千里絃歌沸清晝騎箕一去今幾秋
甘棠蔽芾還依舊振振公子人中麟承家蚤歲攀龍鱗
天上榮沾新雨露剖符復治無為民東風綠遍都門樹
五馬帶將春色去郡人已識使君賢還似尊翁好風度
在昔胡威似父清一時父子俱光榮期君努力追芳躅
勿墜尊翁舊政聲

送思承林貳守之任淮安

昔年曾跨南溟鯤
鞭雷掣手電登天
閣剖符去作冀州牧
春風絃誦盈千門
九載功成重入覲
承恩又佐淮陽政
利器當逢錯節施
驂騑暫向康莊駟
都門出祖華筵張
薰風滿座荷花香
酒闌一笑拂衣去
龍泉燈燈生寒芒
去年我歷淮陽道
平田四望傷秋草
期將丹府一團春
散作甘霖起枯槁

送同年翁宗海歸省

三月鳳城春色好看花踏遍長安道白髮慈親老北堂
夜夜天涯飛夢到九重得請還故鄉片帆便逐南雁翔
舞袖蹁躚錦雲繞壽觴潏灩丹霞光板輿迎養私心穩
還向僊班聯玉筍賸吐胸中五色紋獻入蓬萊補龍袞
送僧石庵歸饒州

上人自是雲水蹤一瓶一錫西復東參禪遊遍京華寺
忽憶故鄉天外峰滿空涼露洗殘暑木杲曉發長河渚
吹醒禪心蘋蓼風驚殘詩夢梧桐雨一夜蒼松偃故山

叢林法侶應知還遙想山中舊猿鶴相迎已出蒼松關
送三山姚志學知臨川縣得美字

禁鐘催盡銅龍水銀蟾半墜鴉聲起有客承恩出帝城
紫陌東風嘶駉駉錦筵祖餞百花前金尊綠酒香浮蟻
酒闌上馬不可留目斷雙鳬碧雲裏瑤琴到日奏陽春
散作絃歌環百里桑麻隨處蒔晴雲桃李滿城簇香綺
汝川之水千尺深知君惠澤亦如此他年青史傳循良
中年善政寧專美

雪後西郊即事

玄雲一望連平陸朔風到處飄
滕六應疑天上有神工
并刀碎剪崑山玉朝來旭日當天紅
乾坤萬象光玲瓏
走馬西郊縱吟目如入瓊瑤世界
中路東甲第連雲起
金帳圍春斟綠蟻路西亦有豪華家
龍管鳳笙喧聒耳
幽人獨愛尋梅花花底敲冰自煮茶
清白無端風味好
豪富紛紛何足誇

內閣試新秋詩

梧桐一葉飄銀牀塞鴻又逐南雲翔祝融促駕收炎光
白帝持節行清商斗杓回指天西方乾坤六合生微涼
寒暑推移羽箭忙翻驚事業無寸長年來自幸遭虞唐
簞羽青霄鵷鷺行祿食朝朝給太倉恩波應與天無疆
赤手未得攀穹蒼擘雲細補龍袞裳況復雙親老北堂
西風華髮添新霜晨昏甘旨無由將仰天但見雲茫茫
烏鳥私情遠故鄉奮身欲往川無梁為忠為孝俱未償
感時撫景心徬徨人非金石那能常終與草木同凋傷

此心終始能無忘可以千載傳流芳逢秋何必愁中腸
題馮醫士藥園幽趣卷和陸修撰鼎儀先生韻

數畝幽居深復深逶迤一逕入雲林開園特傍青山麓
引水遙從碧澗潄市遠不聞來俗駕心閒寧復夢朝簪
籬邊帶雨朝移菊壠上鋤雲晚種苓舊植杏林多結子
新培橘樹漸成陰清香遶舍微風動翠影翻堦霽月臨
功效似能回造化刀圭亦足已呻吟但令枯槁陽春轉
肯受尋常世利侵醫國不殊秦緩手濟時還契葛洪心

笑予俗病幾成癖欲借仙源一洗襟

早朝

百辟朝趨紫禁中衣冠何幸躡仙蹤
雞人纔唱沈殘漏鳳闕將開動曙鐘
天仗入時雲擁道霓旌度處露零松
月臨太液金為水花滿蓬萊錦作峰
韶樂九成儀彩鳳雲車五色駕飛龍
階前紅影開宮扇殿上清光識聖容
鵷鷺兩班星拱極梯航萬國水朝宗
霞凝畫閣晴光爛柳拂雕闌翠色濃
星列泰階俱燦燦春生黼座自雍雍

儒臣朝罷方歸院又促攜辭入九重

內閣試禁中聞鶯

水盡銅龍殘月皎花霧濛濛碧天曉宮鶯夢破一聲鐘
無限清音聽不了綿蠻初起上林東須臾又度長樂宮
似識九重春色好往來長戀禁城中數聲遠出蓬萊樹
縹緲鸞笙隔烟霧數聲近繞掖垣花參差玉笛鳴仙家
倏忽天門上晴旭遠近和鳴無斷續變態中含宮徵音
鏗鏘似奏韶鈞曲豈無燕雀鳴春林繁音啾唧難為聽

亦有鷓鴣啼暮雨淒淒喚起鄉心苦何如鶯囀五雲間
傾耳盡動春風顏蓬班我亦金鑾署日聽清歌發奇趣

送春

惆悵東君又欲回襟懷從此為誰開懶尋南浦踏芳草
自倚東闌看古槐柳外已無鶯宛轉簾前惟有燕徘徊
殘紅狼藉隨風去暗綠離披逐雨來羅綺香消深院落
笙歌夢斷舊樓臺遊蜂有恨環幽樹落絮含愁點碧苔
風景已知留不住漏聲無奈苦相催待看歲晚寒收盡

依舊陽和被九垓

賜扇

宮扇朝頒出金闕
詔賜羣臣掃炎熱
分來紫禁五色雲
裁作青天半輪月
烈日輕搖灝氣清
天香冉冉浮衣襟
阜財解慍平生志
擬助薰風入舜琴

賜粽

鳳城佳節逢天中
袞龍曉御蓬萊宮
光祿傳宣頒角黍
廷臣盡沐天恩隆
中官捧向龍墀案
翠雲擘破黃金爛

天廚製造元異常氤氲滿地香風散却憶故園天一方
無由得奉雙親嘗

止賜酒

故事自十月朔始日賜庶吉士酒至四月晦止歲以為常

聖皇體天敷庶政飲酒亦欲順時令詞林氣候栗冽時
黃封日賜驅寒威盛夏驕陽正炎赫斯時飲酒當知節
以茲特詔光祿官天廚芳醕暫停頒非若楚王慢賢哲
醴酒不為穆生設

題王孟端畫竹

九龍山人標格奇平生與竹同襟期興來為竹寫真意
筆端颯颯生涼颼一枝高拂青霄霧葛陂神物化龍去
一枝低掃白石苔緱山仙子乘鸞來疎影微茫遠還碧
頗似瀟湘秋月夕翠色龍葱近更深又似淇園春雨晴
昔年老可今安在遺蹟流傳重千載山人揮灑更入神
使可見之心亦駭我家閩山叢竹幽翳來不見心悠悠
今日披圖看風景分明一段閩山秋

觀關雀

玉署沈沈春晝靜嘉木滿庭煙翠暝黃雀應知地勢幽
呼朋引類紛成陣萬物雖云各有營爾形至渺良易盈
何事心中亦不平昂頭鼓翅忿且爭兩雄相持不相讓
失勢俱落空庭上戰聲葉底亂啁啾落羽風前飄蕩颺
須臾驚散各西東怒氣猶似橫胸中嗟爾由來氣類同
胡為轉眼難相容嗚呼世人競利亦如此何必臨風深
嘆爾

寄壽母舅鄭梅所先生暨姪李氏七十得齒字

南湖行慶源一派流迤邐烏石山前秀氣鍾華堂直矗
連雲起中有齊眉鶴髮仙紫鳳青鸞相並峙閱世昇平
七十年方瞳雙碧照秋水梅花灼爍晚方妍慈竹龍葱
寒更美我昔棲遲故國時長向堂前拜容止撒部砭愚
荷愛深於分雖甥恩則子年來幸獲遭聖明玉笋聯班
五雲裏閩南回首天茫茫獻壽無由斟綠蟻題詩遠寄
鶴南歸聊代芳筵祝遐祉我家雙親七十餘別來久曠
供甘旨却喜城東數畝廬門牆咫尺聯桑梓相期朝暮

慰離懷壽域徜徉樂餘齒

題林純禮戶部山水圖三首

石室薰風

赤日燒空方六月石室招提最清絕薰風習習起巖阿
爽氣蕭蕭滿林樾林君自是人中仙尋幽慣醉薰風前
簾羽鴻班今幾載舊遊回首心懸懸半幅生綃寫幽致
吟邊猶覺生涼意

綬溪秋月

憶昔曾同泛烟艇特訪綬溪良夜景皓月含秋鏡一輪
晴波漾彩金千頃萍梗飄零苦不常又從雲路同翱翔
眼前皓月雖無恙其奈山川非故鄉他日青霄濟時了
還汴流光共吟眺

玉湖霽雪

天孫夜剪銀河水散作琪花滿林卉平湖萬頃如月明
老龍驚舞澄潭裏我昔釣雪蒼苔磯飽吸清氣歸吟脾
羸馬別來成底事但覺塵土緇人衣何日扁舟棹晴雪

湖心洗我襟懷潔

卷九

壽慶堂為陳景厚地官賦

翠壺之山凌碧穹一脈東去如游龍蜿蜒數里聯鰲峰
峰前佳氣長鬱葱陳家遠自莆城東構堂此地誅蒿蓬
堂中矍鑠黃眉翁一雙碧眼光瞳眈承家喜有賢阿戎
鵷班接武朝重瞳紫誥推恩下九重錦衣光映酡顏紅
君家在昔稱儒宗一門世德誰能同正獻當年輔弼忠
鼎彝刻徧銘勲庸文貞茂德淵以沖一時學者資陶鎔

鈍齋清隱山林中孤雲獨鶴飛長空忠肅生當宋祚終
殺身就義真從容瓚公亦復追其蹤至今清史同昭融
浮世紛紛昧所從貽謀但欲金玉豐園花旦夕開纖穠
秋風回首成空叢何似君家慶澤鍾累葉溥被恩光隆
相期努力攄丹衷大施霖雨蘇疲瘵立身不墜前人風
還壽斯慶垂無窮

壽高都憲父母七十

貴溪之山凌紫虛一雙彩鳳山中居呼吸三氣吞華腴

翱翔千仞起塵汙從教滄海成丘墟雄鳴雌應長康娛
孕秀還生瑞世雛九苞文彩春華敷朝陽碧梧千萬株
春風滿地陰扶疎鳳雛高飛棲碧梧長鳴喜聽諧笙竽
好音終始期不渝喚回四海為唐虞雙鳳之心當益愉
遐齡應與乾坤俱

一樂堂為章丘教諭方君子大賦

鳥山一脉青如龍山前鬱鬱佳氣鍾方家有堂屹當中
堂中樂事應無窮白頭二老肅以雍年華七袞顏猶童

膝下諸郎篤友恭
塤箎迭奏誼春風
靈椿謖草長青蔥
荆花棣萼尤纖穠
此樂由來世罕逢
君家得此誰能同
況有白眉雙阿戎
文章五采稱人雄
伯兮身已凌層空
仲也氣亦吞長虹
龍章不日膺褒封
茲堂樂事當益隆
壽臯州李太守璉母八十

隴西阿嬭女中傑
母儀婦道俱超絕
和丸教子早登庸
五馬專城凜冰雪
作善由來天降祥
年華八袞身康彊
霞帔珠冠侈恩渥
芝蘭玉樹爭輝光
朱門設說當茲夕

黃菊香中啟瑤席和雲石髓甘若飴凝露蟠桃赤如日
贛江之水流滔滔贛民擬釀為春醪年年酌獻萱堂上
用介眉壽南山高使君團團同白首長與贛民作慈母

為周翠渠題雪竹圖

翠壺之陽多綠竹一一昂霄美如玉長風吹雪壓枝頭
節操愈堅不少屈西川方伯周翠渠襟懷不受纖塵污
節比琅玕清比雪四海人稱偉丈夫良工寫此入圖畫
殷勤持贈何為者雪宜呈瑞作豐穰竹擬為簫協風雅

聖皇出治圖雍熙俗未還淳民苦饑丈夫有道須濟時
莫負平生玉雪姿

壽林君叔孟八十

君不見東廣微歲旱禱雨蘇民饑民祝壽考無窮期又
不見竇禹鈞平生陰隲通神明五子貴顯身康寧我愛
林家東谷翁二公之德將無同為兵輸稅寬囚繫為民
輸粟瘳疲癯命服已看旌義槩八旬況復逢時泰兒孫
羣戲老萊衣賓朋共祝莊椿歲從來積善流慶多始終

金史卷之八十二
卷九
一德求靡它德日益新壽益永還看孫子登高科

山海奇觀為崇安司訓屠景賦

景以劉提學委署平海衛學

武夷之山天所闢三十六峰炫丹碧中有精廬祀紫陽
萬古斯文賴昭晰東海之水龍所宮吞吐日月涵長空
海濱佳氣忽融結千年鄒魯聞儒風屠君袞然東浙彥
一經早領鄉闈薦屈登乙榜教崇安劔氣時作虹光見
年來捧檄過吾莆平海武學需師模清操何嘗問修脯
雅志但欲談詩書武夷正在崇安境千古奇觀君已稔

高山仰止長不忘進德之功豈容寢平海城臨東海濱
洪濤細浪皆成文君子之文能若此司馬子長焉足論
觀象於山德應進觀法於海文尤盛來春三策獻天人
疾雷一聲寰宇震

送方介卿還南都

烏石山前舊名閥年來樂事尤奇絕看花春日影聯翩
錫誥明廷寵稠疊憲府難兄偶過家儀曹弟亦迂星槎
雙親鬢毛猶未雪二子銀帶俱生花華誕春風啟瑤席

紛紛獻壽羣仙集安期火棗大於瓜王母蟠桃赤如日
化國之日舒以長雙親壽考應無疆雲路顯揚殊未艾
華堂福祉尤難量移孝為忠有明訓尋常定省何足論
好攄衷悃紹皋夔用致吾君軼堯舜前日難兄赴嶺南
霜威已見摧奸貪今朝難弟歸蘭省明堂不久需梗楠
離筵酒盡青山暮一片愁心關去住他時皓月白門秋
夢魂還繞烏山樹

題魏憲長山水四首

春景

乾坤昨夜東風起春入林巒絢青紫眼前風物有如此
世間何處差可擬初疑皇都二月時花衢柳陌相蔽虧
使君退直金鑾殿獨騎驄馬行春熙又疑五羊城下路
海色山光雜烟樹使君按節觀民風星輶時向棠陰駐
又疑山水如錢塘雨餘處處民耕桑使君分憲恤民隱
陰崖寒谷回春陽又疑風光似南浦滕王高閣臨江渚
使君持憲豺虎藏千里湖山民按堵茲圖雖云咫尺中

俯仰意態應無窮題詩愧無五彩筆為君聊紀曾遊蹤

夏景

青山萬疊高崔嵬流水幾道相縈回曉日村墟煙靄散
薰風樓閣簾櫳開漳南古稱形勝地家尚詩書人禮義
海濱鄒魯名尚存圖中風景無迺是故家門巷深復深
千章古木青森森赤日行空絕炎暑綠雲滿地屯清陰
使君亦是漳名族林隙依稀見華屋牙籤插架光陸離
絃誦通宵聲斷續學成萬里趨天關手扣閭闔呈琅玕

中外激揚振風紀姓名已覆金甌間歲旱還期沛甘澤
回首故山歸未得他日功成作畫遊山川定應增秀色

秋景

昔余早謝紅塵鞅誅茅結屋青山上青山偃蹇如傲人
我意不與山相讓日出羣峰霧露餘乾坤俯仰如冰壺
翠竹丹楓列圖畫清泉爽籟鳴笙竽架有詩書尊有酒
盡洗胸中舊塵垢升沈榮辱豈吾憂耳目肺腸皆我有
年來失計辭故鄉應召萬里朝明光聖恩特畀西江節

要令士俗回淳龐馳驅誓竭駑駘力世路多虞苦難測
半生心事竟沈冥依舊塵埃滿胸臆昨宵飛夢鄉山陬
看山轉覺心含羞寄語移文未須作琴書非久歸林丘

冬景

頑雲亘野同一色朔風驅霰聲瑟瑟須臾散作六花飛
天外羣峯頭盡白入夜郊原積漸平江樹幻作玕琪林
山人中酒睡初起却疑六合秋蟾明我家炎方地少雪
官邸驚看豪興發偶因公事出郊坰縱目湖山賞奇絕

城東綺閣諸王孫
嬌歌響遏行空雲
城西甲第多豪門
流霞泛滿黃金尊
憲臺使君偏耐冷
自擊清冰煮春茗
錦裘珍饌非不能
民有饑寒心未忍
殷勤起訪溪邊梅
乾坤春信何時回
欲挽陽和遍寰宇
盡令寒士歡顏開

送道錄司玄義堵崇德還京

黃金臺下神仙客
秋水精神玉標格
氣凌星斗詩思豪
光射蛟魑劒花碧
一朝拜命辭帝闈
函香萬里來南閩
口宣天語答靈貺
手啟玉笈修明禋
禮成告我還朝去

鶴馭翩然留不住今朝樽酒歌別離明日關山隔雲樹

題東坡遊赤壁圖

誰削層崖如壁立萬仞峻嶒倚天赤亭亭雄據大江濱
氣勢似與江流敵東連夏口西武昌控荆引蜀形勢長
英雄割據竟何在山川千古猶蒼蒼東坡老僊玉堂客
文章氣節稱人傑才大難為世所容萬里黃岡竟遷謫
梧桐一葉驚早秋清宵約客來同遊苑尊漱瀝吸明月
扁舟蕩漾浮中流白露橫江夜將半萬頃浮光影凌亂

孤臣頃刻不忘君感慨長歌望霄漢洞簫一曲倚歌聲
如泣如訴難為聽幽壑潛蛟驚起舞孤舟嫠婦悲淚零
達人襟懷隘八極外物何嘗論得失蠅頭蝸角了無心
山月江風盡堪適胸中礪礪澆未平洗盞更酌陶幽情
酒闌舟中相枕藉旭日欲上東方明高興由來浩無際
此心直與江山契風清月白擬重來茲遊豈盡平生意
十月之望維其時舊遊佳客仍相期牀頭斗酒藏已久
舉網復得江魚肥載酒攜魚泛空碧江山變態應難識

水落石出江有聲斷岬茫茫幾千尺躡衣長嘯披蒙茸
窮搜不憚登虬龍上攀棲鵲之危巢下俯馮夷之幽宮
倦來仍上扁舟去放棹中流隨所住翩然孤鶴橫江來
化作神仙夢中語坡仙一去今幾年兩賦擲地聲鏗然
當時權奸肆排擊不啻腐鼠誰復憐我昔謫官長沙日
滿擬經過訪遺跡典衣沽酒酹英靈一吐輪囷豁胸臆
聖恩浩蕩旋賜還未得遂此瑰竒觀今日披圖發遐想
楚天萬里雲漫漫

東黃四景為族叔祖方軒先生賦

文筆鍾靈

堪輿家謂吾狀元公坊前石幢為黃氏文筆吾宗文獻皆鍾靈於此

石幢亭亭蒼玉立數尋遙倚西山碧宛如大筆架山曲
壯觀莆城間自昔吾家聚族幢之東人豪迭出稱儒宗
咸謂斯幢作文筆千年秀氣茲焉鍾風景依然尚如此
孕秀鍾靈殊未已雲仍努力紹書香罔俾前修得專美
印池流澤

涅槃云前埭一條龍東黃三印斗蓋東黃古有三池謂印斗池

烏山一脉紆且長吾宗奕葉居其陽流水縈迴自山下

到門匯入三池塘池塘一方而小昔有神僧呼印斗
知稼當年擢大魁謂此鍾靈實非偶祖宗積慶良已隆
流澤與此同無窮一派今分東海上詩書擬振前人風

品樹成陰

涅槃云品樹成陰日子孫千萬億吾
宗舊有豫章三株及宋季子姓果多

吾家遷莆歲月深舊栽品樹參天青況復先人多種德
直與茲樹同敷榮慶流孫子昌而熾適當品樹成陰際
因知樹乃德之符神僧特識蒼天意世運推移樹已新
祖宗德澤應長存一德相承能不替會看孫子重振振

稼村聚族

吾宗狀元公號知稼翁鄉人因稱其所居為稼村

伊昔吾宗知稼翁文章氣節稱人雄卜築稼村三百載
參天喬木青龍蔥巍巍先祠屹中峙列屋兒孫自鄰里
蘋蘩歲歲奉蒸嘗燈火家家究經史方軒先生族之良
白頭晦跡東海旁殷勤作圖紀先跡雲仍百世期勿忘

慶同年潘提學應昌壽

號留鶴亞叅應昇兄其所居堂扁曰荆花榮壽

留鶴先生百夫特未老懸車歸故國興來草聖追鍾王
醉後新詩邁元白況復堂前春意賒紫荆灼灼開繁花

天恩汪洋殊未已壽域浩蕩仍無涯
季夏堯堯生七葉先生歲已周
花甲常疑宿酒上蒼顏未許新
霜點玄髮年年此日壽筵開
滿堂歌鼓喧如雷門外賓朋集
珠履膝前孫子傾金壘季方薇
垣久為客目斷鄉山海天碧
幸因嵩祝上京華得遂畫遊
話胸臆天台之山凌九天
臨海之水涵百川開山種秫
釀海水直斬山水俱齊年

題畫魚五首為劉方伯賦

二月澄江春浩蕩遊魚共逐桃花浪
就中錦鯉獨殊常

軒然欲奮青霄上頭角行看變化成鞭雷掣電遊紫清
捲起滄溟千萬頃散作霖雨蘇蒼生却笑長鯨數千尺
橫海吞舟亦何益

神魚遊戲清江潯三十六鱗盡堪數風雲未曾暫徜徉
鰕鱖區區亦為伍一朝變化升天池凡介纖鱗那敢窺
丈夫未遇亦如此紛紛薄俗休相欺

東風吹春滿平湖遊魚作隊依菰蒲一魚悠然出深藻
細鱗巨口形如鱸舉網中流魚可得尊中況有新芻碧

我欲喚起東坡翁共泛扁舟過赤壁

聖主恩波溥八夤羣魚亦得沾深仁有魚依蒲玉為質
有魚戲藻金為鱗躍浪纔看芳渚沿流又入深淵去
因知至理亦如斯隨事隨時無定處

昔年通籍金鑾署太液池邊日來去蒼鱗隔藻弄晴暉
紫蟹攀荷吸朝露倦凡一隔經幾秋此景不見心悠悠
今日披圖賞幽致却疑重向池邊遊

壺山惜別送鄭惟廉歸常山

壺山積雨朝來歇商飈吹紅入楓葉感時對景足驚心
況復行人話離別去年君向壺山陰六經義理鉤其深
駭浪奔騰翻學海鮮葩絢爛翹詞林今日旗亭折楊柳
龍泉如虹射牛斗中立程門道已南阿蒙吳下才非舊
君家世父烏臺英德威久被閩南城騎箕一去今幾載
閭閻赤子猶知名君歸重淬吳剛斧來歲攜登廣寒府
桂花斫取最高枝邁烈揚芬紹前武

半松為莆郡司訓松江宋散賦

蒼松如龍出幽谷未露全身露頭角天生大材不大用
半在雲霄半林壑浮世難逢匠石過空餘滿地清陰多
明堂不作歲云暮松兮松兮奈爾何

題蒼鵠為甯方伯元善賦

東風吹綠垂楊枝搖烟颺日輕如絲幽鳥飛來立枝上
金眸蒼羽標格奇慧性還能學人語花外時聞數聲度
好音擬奏蓬萊宮雕籠鸚鵡休相妬

送林文華先生校文還瑞州

昔年我廁金鑾署先生載道西江去儀刑遠隔廬山雲
夢魂長遶筠州樹今年我客南都城先生拜命司文衡
五夜文星向奎聚一時藻鑑如冰明人生聚散風前葉
昨日相逢今又別離筵無惜醉芳尊後夜相望只明月

題壽星圖壽胡揮使六十

弧南有星光晰晰溥照八荒開壽域降神孕秀應難測
化作人間萬夫特壯歲風雲劒三尺曾掃欃槍樹奇蹟
拂衣一笑歸泉石綠酒黃花供散逸轉眼流光盈六十

方瞳一雙炯如漆蓬矢桑弧懸此夕華筵獻壽羣仙集
瑤池蟠桃如日赤蓬島瓊漿和露碧玉皇案上長生籍
姓名特許今增入乾坤華腴飽餐食日月精英長呼吸
南山之壽焉能匹直與天地同無極

題七賢度關圖

玄雲亘野天將雪寒氣襲人風獵獵關門凍雀棲不飛
關樹寒梢僵欲折七賢逝此將安之山川不憚長驅馳
蹇驢伶俜足無力僮僕跼蹐心苦饑聖賢之仕行吾義

義或不行甘棄置利方為圓豈所能枉尺直尋非素志
翩然拂袖辭朝班採芝笑指雲中山謀生孰計田園少
浩歌且喜天地寬畫史憂時有深見作圖豈但供奇玩
願公獻入蓬萊宮長與君王作龜鑑

雙喜白頭圖為林時潤賦

東風吹綠棠樹枝白頭並立毛羽奇喜鵲亦知春信好
雙飛樹底鳴相依君家高堂多喜氣白頭二老容顏醉
風流畫史最多情特托幽禽寄深意愛親由來根至情

百年雖喜尤兢兢白頭變玄玄復白始慰孝子平生心

承林見素示和曾司直九日無菊詩次韻奉答

江南菊開苦不早百年謾說重陽好我性不飲復無花
雅懷頓減柴桑老雲臺圖畫逐煙塵金谷繁華餘蔓草
看來富貴真浮雲花前有酒須傾倒我雖不飲亦強斟
誰愛名場受閒惱憶昔輜車行役時滿幘飛埃不遑掃
昨承優詔許歸休喜劇應同獲奇寶老得身閒即是僊
安用交梨并火棗歸來重理舊詩書至理淵微細探討

尋常有一契吾心即反於身以自考迺覺從前事總非
天賦吾真漸枯槁迷途未遠幸回轅終愧當年郭有道
洛社風流繼自今珍重同盟永相保詩稱引翼躋壽祺
為君高歌申頌禱修身俟命在吾人此外悠悠隨大造
再和前韻以寫餘興

臺省爭誇致身早誰識黃花風韻好浮沈宦海浩無涯
寵辱驚心容易老紛紛桃李競春華一夜狂風委芳草
吾黨行藏與世違後生譏評恒絕倒懶從勢路乞人憐

閒向東籬被花惱冷蕊疎枝未有期此日蓬門為誰掃
有酒還留待菊開醉臥醒吟是吾寶盤飧淡薄筆溪蓴
果實尋常剥園棗以此易彼誰得失茲理分明易尋討
汾陽功烈震乾坤不過中書廿四考身後流光未百年
故宅疎槐已枯槁人生性分有真樂千乘王侯吾不道
多君納祿早歸來出處完名真自保一度花開一醉吟
百歲為期共君禱莫愁送酒無王弘薄田有秫吾能造
石室小隱得草字

金谷繁華世稱好西風一夜凋零早上蔡威權逼宮吳
東門黃犬嗟難保卓哉羅君契茲道名利場中迹如掃
石室巢雲事幽討一榻清風小蓬島有時豪吟豁襟抱
山中萬物經品藻有時花前獨傾倒陶然一任韶光老
我昔躬耕南畝稻心與乾坤同浩浩年來苦被微名惱
玄髮無情欲成縞野馬何年脫塵阜同向雲中拾瑤草

燕樂亭

在鍾山之陰蔣王祠旁李
司馬所構也代孫奇承賦

蔣王祠下多遊客特構幽亭庇休息八牕嘉樹散繁陰

四座竒峰飛翠色元戎小隊朝出城
醺酒椎牛來落成
綺席弘開縱歡笑新詩迭唱歌太平
因號茲亭為燕樂
歲歲春風還有約願分此樂及蒼生
盡挽疲癯出溝壑
愚軒為高都憲賦

小智私以鑿民風日澆漓狗盜雞鳴
紛變詐神機鬼狀
爭怪竒南臺都憲真超卓鏹采埋光
全太樸滿腔真意
與天遊半點機心無地著世人競諛
佞口舌如箠塤寧
為周御史期期發忠言世人多詭隨
不異鉛繞指寧為

柳士師直道終如始眼看薄俗恆自懲開軒因以愚為
名如公豈是真愚者欲與往哲同垂聲願公無遽歸鄉
土盡挽民風復淳古

三宜庵為高都憲賦

都臺有客人中彥卓犖才華金百鍊忠貞耿耿動宸旒
風裁稜稜肅邦憲哲人所見殊非常世事多與心參商
浩然歸思不可遏千里再拜陳封章臣忝南臺司憲紀
庶政皆歸臣統理設施容或非其宜罪雖有歸臣實耻

老親況復雙龍鍾家無應門五尺童臣沐隆恩歸未得
故山回首情無窮臣齒於今過半百二毛漸覺秋霜白
疾病侵尋志慮衰施於有政寧無惑以茲三事恒自歎
公義私情俱未安揆分惟宜置閒散天恩倘許當銜環
聖主方求經濟者得士如公寧忍舍公心不啻金石堅
丹悃重陳雙闕下帝曰卿才實有為卿言懇懇難竟違
膝下許卿得終養未許終老山中扉綸音南來不信宿
拂衣一笑歸鄉曲進退從容大義明孤標真足扶頽俗

我位於公固不侔我身自揣尤宜休太息高風先著步
題詩送別令人羞

題梅

山人自昔多佳興手種梅花滿幽徑風韻尋常儘絕奇
況有明月相輝映夜深索笑簷之隅仰視天宇如冰壺
獨嗅寒香不成寐起酌尊酒招林逋何當借榻梅邊屋
長與梅花伴幽獨飽收清氣歸肝腸一洗胸中舊塵俗
題畫梅為余君稷興賦

一脈陽和初破凍孤根得氣先萌動南枝北枝爛熳開
商鼎已作和羹夢輕風時度巖谷間清香萬斛飄人寰
獨抱冰霜清白操耻競桃李芳菲顏一般風味尤奇絕
夜靜林梢上寒月疎影橫牕舞翠虬殘英滿地飛香雪
素志寧甘沒草萊移根終向上林栽春色無邊獨占斷
羣花不敢爭先開

江湖覽勝為吳大尹乃兄浩賦

男兒貴有四方志生來門外懸弧矢乾坤萬物備吾身

歷覽寧辭千萬里張騫乘槎犯斗牛子長足跡半九州
博識當時推獨步史才後世誰與儔吳君自是新安彥
劍氣時作虹光見有策不肯干公侯有才不屑事州縣
獨買吳江舟一葉歷遍三江并七澤興發間登江上山
豪來醉弄波間月到處交遊多偉人耳目所接皆奇珍
炯炯靈扁貫今古翩翩襟抱超風塵季方吾莆賢父母
嚴翁就養幾寒暑彩衣又上閩江船綠酒共聽烏石雨
長空雁過秋風涼驪駒又發壺山陽還家故舊應相語

勝覽又經天一方

贈松樓玉上人歌和張坦齋韻

上人風度溫如玉，況復文雅超凡俗。
閉戶繙經戒行修，登堂見客容儀肅。
有時泚筆臨古書，有時引水澆新竹。
或從泉石共徜徉，或與雲月相追逐。
老子借榻兩經春，青眼相看情愈篤。
校書永晝每烹茶，酌客清宵頻剪燭。
同袍幸有坦齋翁，時聽清吟散煩燠。
上人亦學參詩禪，講論時時見心曲。
修纂于今已畢功，分手將歸故山麓。

短歌一闕寫離懷回首南山煙樹綠

三友樓為孫同知賦

徂徠大夫擅高節羅浮僊子應同流亦有淇園古君子
相伴幽人同一樓幽人襟懷絕塵垢共結寒盟號三友
百年大夢杳難醒萬古清風長不朽賢孫佐郡閩海東
宦成回首歸興濃重構危樓題舊扁欲修先緒追前蹤
歲暮羣芳盡凋歇三友敷榮心似鐵相看一笑天地春
權門炙手從渠熱

致仕歸言懷效吳體四首

失脚一下蒼苔磯頓覺世途多險巇聖代敢言輕去就
時評或恐迷是非混雌與雄烏莫辨隔形吠聲尤曷知
歸來穩坐茅簷下閒看白雲生翠微

嬖阿媚世吾所慚便尋舊隱南山南寸心靜觀元了了
衆口可笑猶喃喃秋風世途雙眼冷夜雨吟窩孤夢酣
羹有溪魚飯有粟一飽豈必求肥甘

白日不照吾肺肝曲學阿世誠何顏詩書聊堪遺孫子

杞菊亦足供盤餐
銅山鑄錢彼為得
瓦甕灌畦吾所安
自笑無能成巧宦
只合歸伴沙鷗閒

違心徇祿非吾情
春田夜雨思歸耕
經綸誰能贊化育
出處我豈關重輕
王侯只如槐蟻夢
詩酒聊尋花鳥盟
勲烈無階上鐘鼎
且免青史遺臭名

題吳繼學先生家藏邊景昭花鳥圖五首

琅玕挺碧梅舒白
歲暮相依傲殘雪
一雙靈鵲何處來
枝頭似報春消息
良工畫筆妙入神
寫生一一皆逼真

半幅霜紵纔尺許無限風光照眼新問君茲圖何自得
先公育材有遺澤靈襟元不受纖塵諸生獻此旌衷臆
嗚呼茲圖百世宜珍藏大訓天球端可方

右梅竹
雙鶻

海棠春意酣繁花粲如綺枝上依棲三白頭似惜韶華
不飛起人生亦愛韶華妍眼閱韶華誰百年邁烈揚芬
須及早如此白頭良可憐

右海棠
三白頭

山禽文彩奇映日尤鮮媚一雙飛上石榴枝似與榴花
爭豔麗虞廷九奏歌雍熙鳳儀獸舞紛龍墀茲禽亦合

登廊廟雅性自愛山林棲

右榴花
十二紅

荷蓋已枯槁蘆花亦凋殘雖渠兩兩如兄弟相依不恆
空江寒角弓詩成風漸靡斗粟謠興俗尤鄙紛紛塵世

閱牆人見此微禽願應泚

右敗荷
四鵲

霜竹弄晴翠寒梅發幽姿黃雀呼朋自為伍各求所止
棲高枝茲圖用意良有托持贈寧徒供玩樂先公教鐸

遍儒林共祝兒孫膺五爵

右梅竹
五爵

田家詞

官府年來恣徵討里正登門急於火三冬過半稻初登
翻說今年稻熟早家人相率往田間協力無分少與老
短鎌一派穫聲齊數畝黃雲隨手倒背負肩任初上場
男共播揚女舂擣里正醉飽纔出門督郵復自城中造
急將賤糶納官需且免官刑相苦惱回首場頭稻已空
一年生死良難保小兒彈淚向西風說曹田畔拾餘稻
阿翁回語兒無啼尚冀明年官府好

題萬竿煙雨圖為江士韓賦

我醉飛夢湘江曲
開蓬坐愛湘水綠
兩岸蒼蒼風景殊
簣簣萬箇森如玉
寒雲拖雨出遙岑
輕烟一抹橫前林
斷影微茫鸞鳳舞
清聲淅瀝虬龍吟
遠隔層雲看漸晦
近拂浮嵐望還翠
枝南枝北飛鳥迷
葉上葉下珠璣碎
須臾雨歇起清風
寒烟吹破猶冥濛
妃淚斑斑濃淡裏
孫枝簇簇有無中
江君自是高崗鳳
共結寒盟恣吟弄
命工寫入圖畫間
我見猶疑醉時夢

送何維良歸新淦

刑部員外維孝庶
吉士維一之弟也

北風初釀寒吹老都門柳柳下送君行高歌酌尊酒君
家兄弟不可當攀龍濟濟遊帝鄉憲部僊郎唐杜景詞
垣吉士宋朱昂君亦承家富文藻甘旨庭闈娛二老數
年風雨不連牀幾度池塘空夢草竭來萬里趨京師金
昆玉季情怡怡捲簾笑對荆花樹擊節醉吟棠棣詩回
首孤雲飛絕巘鄉心應與雲舒卷祇愁去住別離難奚
恤往來行路遠酒闌催上路河舟潞河之水隨東流帆
影忽經紅葉岬棹歌迥入黃蘆洲去路行行望桑梓桑

梓微茫隔溪水篋中重整舊斑衣膝下跪斟新綠蟻家
君昔宰幽燕南尊翁載鐸來杏壇山斗光中識顏色珠
璣落處聆笑談君家仲兄鄉進士論交於我最知己紫
陌相逢未幾旬雲山依舊成千里題詩今日送君歸令
人却憶十年時一樂堂中歡會處殷勤為我道相思

病中立秋偶成

春初一臥歷炎暑又見新涼起天宇西風曾不憐我愁
頻向疎櫺送寒雨

予致仕歸因重葺下皋山莊以居偶誦宋馬子才
浩浩歌胸次洒然若有得遂次韻以道所懷

浩浩歌鐘鼎勛庸如命何天降吾衷吾不昧詎肯隨時
徒奔阿得意飽餐光祿飯失意歸耕南畝禾浮雲聚散
吾何與笑渠傾奪紛操戈君不見蘇秦手提六國印千
里騶從徒撓訶又不見馮道身為五朝相四海瘡痍誰
撫摩富貴於時苟無益眼底風花瞬息過浩浩歌鐘鼎
勛庸如命何明道列官烏府署伊川勸講金鑾坡補袞

不求人過失格心惟以道漸磨權奸一見阻去去心靡
他大道日淪喪賢哲終蹉跎時論雌雄元不辨何怪臧
倉毀孟軻浩浩歌鐘鼎勛庸如命何圖書滿牀春拍拍
烟雲遶屋山峩峩俯仰乾坤無大疚吾生所得良已多
神仙渺茫吾不道別有天地長熙和

青雲橋歌

世人行已多愧天興哀變幻如浮烟程氏承家惟種德
世澤如水流蜿蜒篤生封君能述事長橋特駕河之次

青雲端望子成名馬駟馬何勞客題字忠壯雲仍今幾房
封君真足增前光濟人自是陰功厚食報早見鷄雛翔
春風射策金鑾殿勅使傳宣催賜宴冬官政績帝所嘉
錦誥恩封人共羨積善由來慶有餘從茲萬里皆亨衢
行見公侯復其始紛紛薄俗誰能如

賓竹歌

賓竹者舉人曹琰一潤號也

君不見坡仙譏俗士無竹不可醫又不見衛風美進德
葉竹歌猗猗天生嘉植異凡卉狷士品題號君子凌霄高

節挺琅玕撲地清陰絕塵滓曾君種竹遶庭宇謂竹為
賓我為主賢俗豈獨懷坡仙進德直期追衛武古人取
物修其身知仁山水垂法程竹之直兮可以勵吾節竹
之虛兮可以廣吾心直節虚心貫始終高標與竹將無
同天上清風一揮灑人間酷暑何所容功成三徑重歸
日賓主相看無愧色

題山水圖送宋汝勤赴安州學正次劉學士韻

安州我舊遊風景如看畫賢宮清絕隱林塘別構茅亭

芳樹下諸生幽抱此傾寫舞雩詠歸同雅雅君拜新恩
教此州官清地僻心境幽棖桷棟梁收拾遍大手還修
五鳳樓嗟我別來今幾載披圖猶認舊滄洲今日題詩
送君去明日空望停雲天際頭

未軒文集卷九